

Date – 09/10/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Larsap, General (Retd) Vijay Kumar Singh-a'n mipuiten RTI chu tangkai zawka an hman theih nan RTI ACT chungchang an hriat chian a pawimawh tih a sawi.**
2. **Thla 5 kalta chhung khan Aizawl district chhungah mi 15032 thisen test atangin HIV+ hri pai mi 448 hmuhchhuah a ni.**
3. **Prime Minister Narendra Modia chuan nimin khan Navi Mumbai International Airport thawhkhatna cheng vaibelchhe sing 1 sang 9 leh 650 senga din a hawng**
4. **Nobel Prize in Chemistry dawng turin Scientist pathum Susumu Kitagawa, Richard Robson leh Omar M.Yaghi te thlan an ni.**

<><><>

RTI WEEK

Larsap, General (Retd) Vijay Kumar Singh-a'n mipuiten RTI chu tangkai zawka an hman theih nan RTI ACT chungchang an hriat chian a pawimawh tih a sawi.

He thu hi nimina Right to Information (R.T.I) Week lawmna, A.T.I Auditorium, MINECO-a a hmanpuinaah sawiin, Larsap chuan RTI Act chu langtlang, mawhphurhna la ngam leh mipui telna Sawrkar siamtu, eirukna leh rorelna dik lo hailang a, democracy inngahna leh tha tichaktu a ni, a ti a. Sawrkar laipui ruahmana Sawrkar tha siam tura hmalaknate sawiin, chungte chu langtlang leh mipuite thuk zawka an telna tur sawrkar din tura siam vek a ni, a ti.

RTI Act chu mipuite tha tichaka thuneihna petu a nih laiin, midangte chhahibuai nan hrim hrima hman sual a rem lo a ti a, mipui rawngbawlina lam hawi ni lo thil, hun leh tha khawhral nana hman loh tur a ni tih sawiin, sawrkar hnathawkte pawh RTI Act-in a phut angin mawhphurhna an hlen chhuah zel a tul a ti a, an nitin hnate thawk thei lo khawpa RTI hmanga harsatna siam sak erawh ven a tul thu a sawi bawk.

Larsap chuan Mizoramah sum hmuh nan leh mahni hmasial taka RTI Act hmang sual an awm lo ni a a hriat thu leh chhuanawm a tih thu sawiin, kalkhawmte chu mipuite'n RTI Act an hmelhriat lehzuala tangkai taka hman a nih theih nana theihtawp chhuah turin a chah a ni.

R.T.I Week hawnaah hian Chief Information Commissioner Pu John Neihlaia chuan thu sawiin, Mizoram chu India rama RTI Act bawhzui tha berte zinga mi a ni a ti a, kum 2022 July ni 1 atangin Mizoramah RTI online

system kalpui a nih thu leh India rama hetiang kalpui thei hmasa state zinga 8-na a nih thu a sawi a. Nimin October ni 7 thleng khan RTI online application sing 2, 2,078 a luh tawh thu leh, chawhrualin nitin zawhna 18.5 zel lut anga ngaih a nih thute, kumin 2025 ah nitin zawhna 23.6 leh October thla bikah nitin zawhna 31 zel lut anga chhinchhiah a nih thute a sawi a. Pu John Neihlaia chuan RTI Act tihlawhtling turin thawhtute tan la turin a sawm a ni.

He hunah hian public authority website enkawl tha sorkar department te hnenah lawmman pek a ni a: 1-na: Directorate of Tourism, 2-na: Mizoram State Legal Services Authority, 3-na: Directorate of Economics & Statistics leh Consolation: Planning & Programme Implementation Dept leh PHE Dept in an la a ni. RTI Week hi Dist dangah pawh hman a ni.

<><><>

TOURISM MINISTER

Tourism Minister Pu Lalnghinglova Hmar chuan Mizoramah khualzin an pung nasa hle tih sawiin hemi dawngsawng turin Mizo mipuite an inbuatsaih a ngai a ti.

He thu hi nimina Aijal Club-a Mizoram Travel Fest-2025 hawwnaah sawiin, Tourism Minister chuan kum tam vak lo liamta atang khan Mizoramah khualzin lut an tam hle a, abikin kum 2024 atanga kum 2025 inkarah khan ram chhung leh pawn atanga khualzin zat chu Mizoram a cheng zatve vel an tling niin a sawi a, kum 2024-25-a Sairanga rel a luh hma in khualzin nuai 5, sing 2, sang 4, 784 an awm a, kum hmasa aia a punna chu nuai 3, sang 5,670 niin, zaa 139.05 a tling a ni a ti. Sairanga rel a rawn luh hnuah phei chuan khualzin an pung leh zual tih sawiin, Mizoram mipuite chuan khualzin te chu engtingge an lo mikhual ang tih te, Mizoram an rawn tlawh duh zel nan engtianga lo inbuatsaih tur nge tih te chu Mizoram Travel Fest-2025 ah hian zirchhuah an tum dawn tih a sawi.

Tourism Minister chuan karleh maia Champhaia Hnabsin kut neih turah pawh Champhaia hotel leh homestay bakah tent te pawh an hauh fai vek tawh a ti a, November thlaah Leitlangpui music festival leh Red bull urban downhill te pawh buatsaih a la ni dawn tih sawiin, December thlaah pawh Winter Festival bakah thil lian tak thlen theih an inbeisei a a ti.

Nimin atanga neih tan Mizoram Travel Fest-2025 hi Zirtawpni thleng khian neih a ni dawn a, Travel Fest hawwna inkhawm neih zawh hian Aijal Club Park ah YWCA nen tangkawpa buatsaih, Mizo Thali Cooking Competition neih chhunzawm a ni.

<><><>

PWD MINISTER

PWD Minister Pu Vanlalhlana chuan Mizoram hmar lam tlangdunga khawkar kawng hrang hrangte a tlawhkual a, kumin fur ruahtui tla nasain a tihchhiat Khawruhlian khaw hnuai NH-02 kawng, thawmthat hna kal mek pawh a hmunah kalin a enfiah nghal.

Khawruhlian khaw bula NH-02 kawngpui hi kumin July thla leh September thla khan metre 50 vela zauin hmun hnihah, lirthei kaltlang theih lohina a flabal a, PWD ten chak taka hmalain tunah hian temporary-in thawmthat hna thawh mek a ni a, lirthei pawh a tlantlang leh thei tawh a; Special Repair Estimatecheng vbc 2 leh nuai 65 chu September ni 9 khan Ministry of Road Transport & Highways-ah thawnthlak a ni tawh bawk a ni.

Minister hian kumin October 21-23 a Sakawrdaia YMA General Conference neihna tur atana inbuatsaihna ni pahfawmin leh mipuite tan zin veivahna nuam leh him zawk a awm theih nan, Mizoram hmarlam tlangdung kawng hrang hrangte, Sakawrdai thlengin a tlawh leh bawk a; Mauchar, Serkhan leh Bagha inkar kawngte bakah Sihphir leh Durtlang inkar kawngte pawh a tlawh leh bawk dawn a ni.

<><><>

AIZAWL DIST AIDS PREVENTION COMT

Thla 5 kalta chhung khan Aizawl district chhungah mi 15032 thisen test atangin HIV+ hri pai mi 448 hmuhchhuah a ni a. Nu naupai 3584 thisen test atangin HIV+ hri pai mi 19 hmuchhuah an awm a ni. HIV+ kai te hi kum 25-35 inkar mi an tam ber a, Kum 14 hnuailam pawh mi 7 lai an awm a ni.

Aizawl District AIDS Prevention and Control Committee (DAPCC) chuan DC conference Hall-ah, District bawrhsap leh DAPCC chairman ni bawk Pu Lalhriatpuia kaihruaiin nimin khan meeting an nei a, he meeting a tarlan danin, HIV+ an kaina chu: Mipat hmeichhiatna hman atangin zaa 76.3 a ni a, mahni anpui kawp leh kawp lawr atangin zaa 6.4, Hriau inhmantawm atangin zaa 14.7, Nu leh Pa atangin zaa 1.5 leh kaina hriat loh zaa 0.8 te an ni.

Meeting-ah hian kumin April-August chhunga DAPCC hmalakna hrang hranga thlirletna hun hman a ni a. Aizawl district chhunga HIV+ hri kai thar an pung zel chho chungchang sawiho a ni a. Intensified IEC (Information, Education & Communication) hnuai thla 5 kal ta chhunga hmalakna hrang hrang report thlirho a, rawtna hrang hrang leh hmalak zel dan tur te ngaihthlak a ni bawk.

<><><>

AIZAWL DIST

Aizawl District Magistrate-in Aizawl District huamchhungah phalna nei lova Petrol leh Diesel zawrh leh hralh a khap.

Aizawl District Magistrate Pu Lalhriatpuia chuan thuchhuah siamin mahni remhriat dana petrol leh diesel dah that a, zawrh ve ngawt chu a him lo hle a, fimkhur tâwk loh vângin kângmei nasa tak tichhuakin nunna hial chhan theihna khawpa hlauhawm tih sawiin, phalna nei lova petrol leh diesel zawrh a khap tlat a ti a, dân ang taka petrol leh diesel hralh a lo nih theihna tur leh mipuite him tlân zawk nan thla hnih chhung chu Aizawl District huamchhungah phalna nei lova Petrol leh Diesel zawrh leh hralh a khap a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nimin khan Navi Mumbai International Airport thawkhatna cheng vaibelchhe sing 1 sang 9 leh 650 senga din chu Maharastra-a Mumbai ah a hawng. Hei bakah hian Pu Modia hian inkalpawhna project dang a hawng bawk a. Heti hain Mumbai hi khawvel khawpui lian dang London, New York leh Tokyo te angin International Airport pakhat aia tam nei zingah a tel ve ta a ni. Thusawiin Pu Modia chuan he airport thar hian Viksit Bharat hmathlir a entir tih sawiin ram hmasawna leh technology lama theihna a tarlang a ti bawk.

Nimin vek khan Prime Minister Narendra Modia chuan India Mobile Congress a hawng bawk a. Thusawiin digital hmanga inbiakpawhna chu mi hausate hman tur chauh ni tawh loin vawiinah chuan rampumah mitin nuna bet tlat a ni tawh a ti a. Pu Modia chuan 2G ah pawh harsatna awm thin kha tunah chuan ramchung district tinah 5G a thleng tawh a ti bawk. Ni li awh tur he inkhawmpui hi Asia-a a lian ber niin telecom leh technology lama hmasawna tur hrang hrang ngaihtuah a ni ang.

<><><>

NOBEL PRIZE

Nobel Prize in Chemistry dawng turin US,Japan leh Australia atanga Scientist pakhat theuh thlan an ni. Heng scientist te hi Susumu Kitagawa, Richard Robson leh Omar M.Yaghi te niin metal-organic framework-a siamchhuah avangin Nobel prize hi hlan an ni dawn a. An thil siamchhuah hi khawvelin harsatna a tawh mek pollution, sik leh sa inthlak, tui thianghlim kang zel siamthatna atan a tangkai dawn hle a ni

<><><>